

# Gooooool!!!

Nos tur ta konsiente ku nos komunidad ta den krísis...vários krísis simultaneo. E krísis finansiero ta pone nos tur hala faha mara. Nos ta deseá pa pone un paro na e krísis kriminal AWOR! Un krísis familiar tambe ta visto: famianan ta spat for di otro, yunan ta pa nan kuenta. I nos no por ignorá e krísis moral.

Tantisimo idea ta presentá kiko mester hasi pa solushoná nos problemanan. Tin ku ta konvensé ku mas polis t'e solushon, òf mas fasilidat deportivo, mihó edukashon, èts. Algun ta haña ku manifestashonnan lo yuda. Otronan ta sigur ku yudansa di Hulanda t'e kontesta. Anto tin esnan ku no ta mira solushon por lo pronto i ta hisa bela bai fo'i d'jaki! Ma en realidat, ningun di e solushonnan ei ta kohe e baka na su kacho...**ningun ta trata ku rais di e problema!**

**Echu ta ku nos ta den e krísis aki pa motibu di un krísis spiritual-moral.** Ora hende ta bandoná e normanan i balornan di Dios, sigur sigur nan lo haña nan den “choka mata”. Nos islanan ta den “choka mata” pasobra nos a bandoná e normanan di Dios! Nos simpelmente ta kosechá loke nos a planta!

Kiko anto ta e solushon? **Bolbe bèk na Dios i e normanan i balornan ku El a preskribí... formashon di karakter!**

Nos ta usa e palabra “karakter” den diferente sintido. Ma un bon definishon ku nos a enkontrá ta “**karatker ta e motivashon interno pa hasi loke ta korekto, irrespekto di e kosto.**” Den otro palabra, e persona sa loke ta korekto i ta hasié apeser di kontratempu. Un hende a bisa ku karakter ta loke bo ta den skuridat—ora ningun hende ta mira, ora ningun hende lo haña sa kiko bo a hasi. Un hende di karakter lo duna respèt, sea puntual, onesto, responsabel, umilde, sinsero, demonstrá kontrol propio, èts...tur kalidatnan ku Beibel ta promové. Por ehèmpel, “*I sea kariñoso ku otro, misericòrdioso, pordonando otro, meskos ku Dios den Kristo tambe a prodoná boso*” (Efesionan 4:32).

**Karakter ta indispensable pa kambia nos situashon.** Un proverbio chines ta bisa: “Si tin rektitut den e kurason, lo tin bunitesa di karakter; si tin bunitesa di karakter, lo tin armonia den kas. Si tin armonia den kas, lo tin òrdu den e nashon; si tin òrdu den e nashon, lo tin pas na mundu”.

Tabatin un tempu na nos islanan ku hende no a lòk porta di kas ni di outo. Tabatin un tempu ku debe tabata kasi deskonosí. Tabatin un tempu ku bo ta sinti sigur den bo mes kas. Tabatin un tempu ku nos hendenan tabata konosí komo bon trahadó. Tabatin un tempu ku un akuerdo verbal tabata mes sigur ku un kontrakt firmá. E tempu ei a pasa pa olvido...pa falta di karakter. **Ma e tempu ei por regresá si henter nos komunidad traha riba karakter!** Nos ta eksperenshá e krísis finansiero, kriminal, familiar, i moral pa falta di karakter!

Siman pasá, nos isla a tuma e promé paso importante den un bon direkshon! Ku enkurashamentu di nos gobernantenan, Pancho Cicilia i otro miembronan di SEK a organisá un konferensia pa prepará dosentenan pa traha riba formashon di karakter di alumnonan na skol. Nos ta aploudí e iniciativa aki!

Ma nos tambe ta preokupá. Señor Cicilia a ekspresá su deseo pa formashon di karakter bira algu ku ta alkansá kada persona den nos komunidad. E tin rason. Si dosentenan so ta traha pa forma di karakter, un gran parti di e poblashon di nos isla ta keda afó. Tantu mayor komo yu, tantu empleado komo gerente, tantu gobernante komo suidadano, tantu komersiante, polis, abogado, èts. mester traha riba formashon di karakter.

Theodore Roosevelt tabatin rason: “Pa eduká un persona mentalmente ma no moralmente ta pa eduká un menasa pa nos komunidad”. Pancho Cicilia i su koleganan ta hasi algu pa kambia esaki! Den nos opinion nan a skor masha haltu ku e iniciativa aki, i pesei nos ta grita “gooooool!!”